

1 Peter

Saint Peter Tr'ookit Dęhtly'aa Daąantl'oo

1 ¹Shii t'ee Peter t'ihchy'aa, Jesus Christ neeyahah'ak ihkii, Pontus, Galatia, Cappadocia, Asia, Bithynia nahkat gwik'injiighit naąi nakhwats'a' ch'adihtl'oo t'ishi'in. Vit'eegwijyahchy'aa, dinjii gweendih gwa'an gwigwich'iį naąi gwitee tr'inlii eenjit. ²Vit'eegwijyahchy'aa Gwiti' k'eegwiichy'aa eenjit gwitee tr'anakhweinlii t'oonchy'aa, aąits'a' nakhwayinji' Ch'anky'aa Shroodiinyaą zhit shroodiinyaą nakhwiltsaąi. Jesus Christ vik'eegahohthat ts'a' nakhweenjit niindhat aąi vadaa k'iighai' chan nakhwagwandaii, shroodiinyaą heelyaa.

Vich'eegoonzhrii, tsinehdan haa leąi nakhwats'an oolį'!

Gwandaii Ndaanaą'a' Kwaa Eenjit Vit'eegwijyahchy'aa Vit'injiraahchy'aa

³Vit'eegwijyahchy'aa aąi Diik'eegwaadhat Jesus Christ Viti' aąi vats'a' mahs'i' goonya'. Gwandaii k'eejit tr'ihee'yaa geenjit Jesus Christ eeneegwıldaii. Neeshraahchy'aa diinoonyaą ts'a' gwandaii k'eejit diitl'eiin'aąi. Aąi gwik'iighai' gwandaii tr'ihee'yaa gaagwiindaii. ⁴Aąits'a' jidii Vit'eegwijyahchy'aa gwinzii leąi diineenjit khagwilzhii ts'an hqoh'yaa, eenjit zheezhit khagwilzhii zheekat gwizhit duuyeh an ilii aąits'a' duuyeh ch'ijuk t'ineenjii, izhit nakhweenjit yiłdlii. ⁵Jii kwaii t'ee nakhwats'an nilii, nakhwak'injigwiighit k'iighai' Vit'eegwijyahchy'aa vat'aii ts'an neehohshii, nijin ndaagwaa'a' jį' gwizhrih nagwahaatth'aa eenjit.

⁶Ajî kwaii gwats'anh shoo qhîjî, geetee hee tr'agohdii gwilik ts'â' khaiinjich'akhwadhat ji' gaa. ⁷Khaiinjich'ahokhkit gwik'iighai' nakhwak'injigwiighit zhit K'eegwaadhat vit'injihohchy'aa. Gold gaa khan an heelyaa. Gold kô' zhit tr'ahk'an k'iighai' vakat shraîh kwaa, ajî gwik'it khaiinjich'ahokhkit gwik'iighai' nakhwagwik'injigwiighit shroodiinyaâ heelyaa. Nakhwagwik'injigwiighit gold gaa andaa veegoo'aii ts'â' duuyeh an ilii. Nijin Jesus Christ vineegwaakî ji' Vit'eegwijyahchy'aa gwinzii nakhweegiheekhyaa gwiizhit gwihil'ee ts'â' vich'eegwahndit nakhwats'an hahtsyaa. ⁸Nôh'in kwaa gaa nihk'it veet'ohthan, ts'â' vik'injuhkhith, gaa ajî veet'ohthan ts'â' vik'injuhkhith geh'an nakhwazhit shoh nitsii dha'aii. ⁹Li'didlii haa Jesus k'injuhkhith geh'an nakhwazhin neehahshii.

¹⁰Jii neenakhwahahshii gwiinya' t'ee Vit'eegwijyahchy'aa Eenjit Ginkhii najî yeenaa dajî' datthak gwinzii gwik'eegahaandal googwahtsii, vich'eegoonzhrii nôh'in ajî't'ee adan t'inchy'aa. Gwik'iighai' jidii nakhweenjit Vit'eegwijyahchy'aa di'îjî goovaagogwahaandak eenjit. ¹¹Nijin ji' zhat nats'ahts'â' nigweheedhaa gaageheendaii eenjit gwik'eegogwandaii. Jii t'ee Christ vik'iighai' Ch'ankey'aa Shroodiinyaâ goozhit t'inchy'aa, Christ khaiinjich'iheeghit, ajî't'êê vatajî ch'eegwahndit gwehee'aa. ¹²Ajî Vit'eegwijyahchy'aa Eenjit Ginkhii najî ts'â' gwigweelkîjî, ideenjit t'igwii'in kwaa gaa nakhweenjit. Gwandak Nizîjî eenjit geech'ôaqtan najî geegiginkhe', zheekat gwats'an Ch'ankey'aa Shroodiinyaâ Vat'aii haa, zheekat gwich'in najî googaa jii deegwinyaâ t'igwinyaâ gaagoondaii giindhan.

Shroodiinyaâ Haa Gwireheendaii Gwizhrîh!

¹³Jii datthak geenjit gwint'oo nakhwayinji' ohta', Jesus Christ vineegwiilkîjî ji' ch'eegoonzhrii nakhwant'eehee'aa izhit gwizhrîh khit ts'â' gôhta'. ¹⁴Vit'eegwijyahchy'aa vik'it t'akhwa'in, ts'â' nijin nakhwagwizhi' kwaa ts'â' gwiizûû zhrih t'akhwa'ya' nohthan chy'aa chan gwik'it t'akhwa'ya' shrô'! ¹⁵Ajîts'â' Vit'eegwijyahchy'aa shroodiinyaâ noonyaâ gwik'it shroodiinyaâ zhrih qhîjî. ¹⁶Dêhty'aa Choh zhit deegwinyaâ gwik'it, "Shroodiinyaâ ihîi gwik'it nakhwan t'ee shroodiinyaâ qhîjî."

¹⁷Vit'eegwijyahchy'aa vats'a' khadagohjii dajî' Shiti' vohnyaâ. Juu dinjii nizîjî nilii najî nats'ââ dinjii ginilii gwik'it gwitee

tr'agooviheelyaa. Ts'a' dzaa nankat gohdaii ndaagwahaa'aa gwats'a' datthak geenjit khadhoh'ee. ¹⁸ Yeenii nakhwalak googwitr'it gwiizuu naji k'it gohdaii gwats'an tr'ineenakhwiilii aji kii daat'oo (silver, gold) khan an ilii haa goinkwat kwaa t'inchy'aa. ¹⁹ Christ vagwandaii akwat vadaa hil'ee ts'a' daat'oo, juu Vit'eegwijyahchy'aa vidivii gii vatr'agwaanduu gwakwaa nilii haa goinkwat t'inchy'aa. ²⁰ Vit'eegwijyahchy'aa, jii nan hahtsyaa gwehkij daj' gwitee tr'iyaahchij, juk Khaiinkoo Drin zhit nakhwats'a' gwizhrjh nagwaatth'at ts'a' jii datthak nakhweenjit t'izhit t'inchy'aa. ²¹ Vik'iighai' Vit'eegwijyahchy'aa vik'injuhkhith dhoodlit. Vit'eegwijyahchy'aa t'ee yineegwidaii ts'a' ch'eegwahndit yint'eegwiin'aji ajits'a' nakhwak'injigwiighit yeendaa ji' Vit'eegwijyahchy'aa t'injihahchy'aa geenjit.

²² Li'didlii k'eegothat geh'an nakhwatr'agwaanduu akhagoonyaa ts'a' zhit juu gwik'injiighit naji eet'ohthan. Ts'a' nakhwadrii datthak haa nihleenjit ch'eet'igwiniindhan khwa'ij. ²³ Vit'eegwijyahchy'aa viginjik gwandaii ts'a' khith geenjit gwandaii eh'an ch'iyehghan khith geenjit gweheendaii ts'an nakhwagoodlit t'oonchy'aa. ²⁴ Jii t'ee Dehtly'aa Choh kat gwadanakhwat'oo:

“Dinjii naji t'oo nahshii k'it t'iginchy'aa,
googihil'ee aji zhit nankat gwanzhjh gwinzii vigweech'in
nahshii k'it t'inchy'aa.

Aji flowers ts'a' t'oo haa nahshii
aji gwats'anh tr'aadhak ts'a' nihlaa agaji,

²⁵ gaa K'eegwaadhat viginjik aji khith geenjit dha'aa.”

Jii Gijnjik kwaii t'ee Gwandak Nizij zhit gwadanakhwat'oo, aji nakhweenjit t'inchy'aa.

Jesus, Kii K'it T'inchy'aa

2 ¹ Jidii tr'agwaanduu nakhwagwitr'it gwanlii datthak akhagohnyaa; ohts'it kwaa, nizij adoolij kwaa, ch'izhii dinjii naji jidii giijij aji khith ts'a' dinjinooghit shro', nakhwaghit gwats'an ginjik iizuu haa gohkhyaa shro'! ² Tr'iinin tsal vagoodlit ts'a' ch'oolma' zhrij niindhan, aji gwik'it nakhwan t'ee Vit'eegwijyahchy'aa Viginjik eenjit nakhwazhit gwiits'ik. Gwik'iighai' neehohshii t'oonchy'aa. ³ Dehtly'aa Choh zhit jyaa t'igwinyaa, “K'eegwaadhat deegwaht'oo ch'eegoonzhrij nilii gwiky'uunjik.”

4K'eegwaadhat vats'a' hohjyaa, kii-gwandaii k'it veegoo'aii, aji kii t'ee lejii najii gooveenjit giilj' k'it t'inchy'aa gaa Vit'eegwijyahchy'aa gwitee tr'iyahchij aji hil'ee ts'a' yaah'in. 5Nakhwan aji Kharigidiinjii Zehh, kii Ch'ankey'aa Shroodiinyaq haa gwiltsajj ts'a' giinkhih shroodiinyaq qhlij. Jesus Christ k'iighai' Vit'eegwijyahchy'aa nakhwashooahlyaa eenjit nakhwayinji' vant'oh'ajj. 6Dehtly'aa Choh zhit jii jyaa nyaq,

“Gwint'oo kii chil'ee gwitee tr'ihih'aa.

Zion * zhit vakat zehh nigwirehee'aa eenjit.

Juu Vit'eegwijyahchy'aa k'injiighit najj khit goodivee gweheezyaa geenjit.”

7Juu gwik'injiighit najj eenjit kii chil'ee nilii, gaa juu gwik'injiighit kwaa najj aji kii gooveenjit chil'ee kwaa:

“Aji kii vaa ndak goo'aii lyaa gwandaa gwintsii veegoo'aii lee gwik'eegahaandal.”

8Dehtly'aa Choh kat ch'adanh gwa'an jyaa digwinyaq,

“Jii kii dinjii najj deekwaii dha'aii ts'a' veh'an dinjii najj git'eehadhak.”

Vit'eegwijyahchy'aa deeyiindhan aji gwiginjik k'injigiighit kwaa geh'an giit'eegahaadhak.

9Gaa Vit'eegwijyahchy'aa gwitee tr'anakhweeinlii, king viginkhii qhlij, nahkat gwich'in najj shroodiinyaq qhlij, ts'a' Vit'eegwijyahchy'aa vigii chan qhlij ts'a' shroodiinyaq qhlij ts'a' gwinzii t'ee'ya' geegwahoondak geenjit gwitee tr'ineenakhwanlii, ajit'ee toq k'ii'an gwats'an tr'anakhwinlii ts'a' va'aadrii ch'eegwahndit zhit nakhweenlii. 10Ch'ihlan Vit'eegwijyahchy'aa digii najj ts'a' neeshraahchy'aa niindhan gaakhwandaii kwaa, gaa juk aji Vit'eegwijyahchy'aa neeshraahchy'aa nakhoonyaa ts'a' chan vigii qhlij.

Vit'eegwijyahchy'aa Va-slaves Tr'iheelyaa Gwizhrj

11Shijyaa najj, jii nankat aakin qhlij ts'a' zhyaa gehgoohohjyaa, gwiizuu ninjich'qhthat akwat gwiizuu t'ooshi'ya' yuuhtan aji kwaii gwits'j' adak'qontii, jii kwaii nakhwagwandaii zhit gwits'j' ninjich'its'ohthat reh. 12Gwik'injiighit kwaa najj tee khit gwinzii tr'agoh'in, iizuu nakhwagahajnyaa ts'a' nakhwagigiheekhyaa

* 2.6 Zion t'ee Israel nahkat t'agwarahnyaa

gaa Vit'eegwijyahchy'aa k'ineeheedik drin ji' nakhwagwitr'tit gwinzii lee geedahkhai' gwik'igahaandal ts'a' izhit geenjit Vit'eegwijyahchy'aa deegahah'aa.

13 Jii nankat k'ih dilk'ii naji datthak gook'eegohthat, Diik'eegwaadhat veenjit. Juu nahkat gwakhaihkwaii choh(Governors), 14 aji khaihkwaii vitsyaa naji chan, juu gwiizuu t'ii'in naji khaiinjich'igiighit gahtsii ts'a' juu gwinzii t'ii'in naji yinjigih'ee. 15 Vit'eegwijyahchy'aa gwinzii t'akhwa'in nakhoonyaa, zhit juu tr'igwinjik ky'aa ginkhii naji deegogwahahtsai' kwaa eenjit. 16 Deekhwa'ya' nohthan datthak gwik'it gohdaii ts'a' gwiizuu t'akhwa'in aji nagoh'ii shro', gaa Vit'eegwijyahchy'aa va-slaves qh'ii k'it gohdaii. 17 Juu naji datthak yinjiihooh'ee, gwik'injiighit naji chan eenjit ch'eet'igwiniindhan khwa'ii. Vit'eegwijyahchy'aa viyinjiioh'ee, nankat gwats'a' k'eedeegwaadhat chan viyinjiioh'ee.

Nats'aq Christ Khaiinjich'iighit Gwaraah'in

18 Ch'itsyaa naji, juu nakhwats'a' k'eedeegwaadhat naji yinjiihooh'ee. Zhit juu nakhwats'a' nizii zhr'ih kwaa gaa zhit juu nakhwats'a' iizuu naji chan. 19 Geenjit kwaa khaiinjich'akhwaghit eenjit Vit'eegwijyahchy'aa nakwashooah'ya, Vit'eegwijyahchy'aa deekhwa'ya' nakhoonyaa gwik'it t'akhwa'in geh'an. 20 Gwiizuu nakhwagwitr'tit gwanlii eenjit khaiinjich'anakhwarakhhit ji' jidii gaiiyiigohtsii? Ch'akwaa! Gaa gwiizuu nakhwagwitr'tit gwakwaa gwiizhit khaiinjich'anakhwarakhhit ji' Vit'eegwijyahchy'aa nakwashooah'ya. 21 Jii kwaii geenjit t'ee Vit'eegwijyahchy'aa gwitee tr'anakhweeinlii t'ii'in; Christ nakhweenjit khaiinjich'iri'that vik'it t'ahohchy'aa eenjit. 22 Vatr'agwaanduu gwakwaa, ts'a' ch'ih'ok gaa oots'it kwaa. 23 Gwiizuu datthak giits'a' ginkhii dai' gwidii ginkhe' kwaa, khaiinjich'igiyahtthat dai' khaiinjich'anakhwaha'khhit t'oonchy'aa nya' kwaa. Gaa yeendaa ji' geenjit Vit'eegwijyahchy'aa t'injyahchy'aa, juu khit ts'a' shroodiinya' haa gwitee tr'anakhweeinlii. 24 Christ, diitr'agwaanduu eenjit cross aghwaa, chan tr'agwaanduu tr'ineegwahoh'ya kwaa geenjit ts'a' Vit'eegwijyahchy'aa vik'eegwahohthat haa gwah'ohdaii. Gwint'oo khaiinjich'iighit k'iighai' neediinahshii. 25 Gwehk'ii divii vaatr'igweendaii k'it

t'ohchy'aa, gaa juk Divii k'aqhtii khaihlan nineekhwanlii ts'a' nakhwayinji' k'aqhtii t'oonchy'aa.

Ch'a'at ts'a' Ch'akai' Haa

3 ¹Ch'itsyaa najii, goots'a' k'eedeegwaadhat gihi'ee gwik'it, ch'a'at najii, nakhwakai' k'eegohthat, ch'akai' najii Vit'eegwijyahchy'aa Viginjik k'injigiighit kwaa ji' gaa, ch'a'at googwitr'it gwinzii k'iighai' gwik'injigeheeghit giheelyaa. K'eegwiichy'aa t'ohnyaa gwat'oohchy'aa kwaa. ²Jyahts'a' nakhwagwitr'it hi'didlii nilii aajts'a' Vit'eegwijyahchy'aa viyinjikhadhoo'ee gwagwahaaqah'yaa. ³Tr'ihkhit k'aiich'ii noonzhi' shro', nats'a' nakhwakiighai shroh'ii, nindal noozhii, ts'a' jidii ik nootsuu k'iighai' gwinzii nakhwagoochy'a' shro'! ⁴Gaa nakhwadrii zhit gwats'an gwizhrh' gwinzii nakhwagweech'in veeshroonchy'aa akwat deegwaatsai' kwaa nilii t'ee Vit'eegwijyahchy'aa vandee zhit gwintsii veegoo'aii. ⁵Jyahts'a' t'ee yeenii tr'injaa najii Vit'eegwijyahchy'aa k'injigiighit ts'a' gwit'injyaahchy'aa najii ts'a' yeendaa geenjit dagakai' k'eegogwahthat ts'a' geedan t'ee lyaa gwinzii gooyiichy'a' needagaatsik. ⁶Sarah t'ee jyaa dinchy'a', dakai' Abraham k'eegwifthat ts'a' shats'a' k'eedeegwaadhat yahnyaa. Gwinzii nakhwagwitr'it gwanlii ts'a' k'eegwiichy'aa goonjat kwaa ji' nakhwan it'ee vichi' qh'ii.

⁷Izhit gwik'it ch'akai' najii nakhwant'ee, nakhwa'at nakhwandaa t'aqht'aii kwaa ganoondaii. Nan, nakhwa'at haa Vit'eegwijyahchy'aa khit gwandaii nakhwats'an hahtsyaa t'oonchy'aa, aji geh'an nakhwa'at gooveenjihq'ee. Khadagohjii ts'ooghaih gwehee'aa kwaa eenjit jii kwaii datthak t'akhwa'in.

Gwinzii T'akhwa'in Eenjit Khaiinjich'ahokhit

⁸Akwat t'ee juk nihts'a' deekhwazhit geenjit nihleenjit tr'agohdii ts'a' ch'ihlak ninjich'aadhat k'it t'ohchy'aa, nihloondee nihleet'iindhan k'it. Nihleet'oothan ts'a' nihleenjit ninjich'qhthat gwiizhit nihlandaa ohtsii nohkhy'a' shro'! ⁹Gwiizuu nakhwats'a' tr'agwagwah'in dai', izhit geenjit nakhwan chan goots'a' gwiizuu haa tr'agoh'ya' shro', gwiizuu nakhwats'a' girinkhii ji', izhit geenjit nakhwan chan goots'a' gwiizuu haa gwidii gohkhyaa shro'! Googaa gwinzii, haa gwit'ii neegohkwat.

¹⁰Jii t'ee D'htly'aa Choh zhit jyaa digwinyaa,

“Gwinzii goiindhaidii nohthan
 ts'a' gwinzii goo'ya' nohthan ji',
 chan gwiizqu goiinkhyaa shro',
 ts'a' chan oiints'it shro'!

11 Nakhwadrii datthak haa tsinehdan geenjit gwik'eegohdaii,
 ts'a' iizqu gwigwitr'it ts'i' adak'qontii,
 ts'a' gwinzii t'akhwa'in.

12 Diik'eegwaadhat juu jyaanchy'aa naji datthak dandee haa
 gook'aqhtii,
 giits'a' khadigiinjii daj' datthak gooviitth'ak,
 gaa juu tr'agwaanduu t'ii'in naji ts'i' t'inchy'aa.”

13 Gwint'oo nakhwagwitr'it gwinzii gooli' nohthan ji', juu geenjit
 nakhwagwahahshii? 14 Gaa Vit'eegwijyahchy'aa deekhwa'ya'
 nakhoonyaa gwik'it t'akhwa'in geenjit khaiinjich'anakhwagahthat
 ji', geenjit shoo qhii. Tr'agohdii shro' gwiizhit ch'ihlee gaa oonjat
 shro'! 15 Christ, Nakhwak'eegwaadhat t'inchy'aa geenjit nakhwadrii
 zhit gwats'an viyinjiihoh'ee. Jii gwik'injigwiighit nakhwadrii zhit
 gooh'ajj geenjit nakhwarahkat ji', geenjit shriitr'agwadhoh'ajj.
 16 Gooveenjit yinjiihooh'ee ts'a' gooshroonjyaa haa t'akhwa'in.
 Gwinzii t'akhwa'in geenjit gwiizqu nakhweegiginkhii ji' oozhii
 giheelyaa geenjit. 17 Jii ganoondaii, Vit'eegwijyahchy'aa
 khaiinjich'akhwaghit nakhwoihnyaa ji', tr'agwaanduu
 gwigwitr'it t'akhwa'in geenjit khaiinjich'anakhwarahthat ajj
 gwiizqu, diigwitr'it gwinzii gwanlii eenjit khaiinjich'anarahthat
 ajj gwandaa gwinzii t'oonchy'aa. 18 Christ t'ee ch'ihlok ts'a'
 ndaagwaa'ajj gwakwaa nakhweenjit niindhat; diitr'agwaanduu
 geenjit niindhat, Christ vatr'agwaanduu gwakwaa gaa dinjii
 vatr'agwaanduu gwanlii naji eenjit niindhat, Vit'eegwijyahchy'aa
 ant'eedihaachyaa eenjit. Dinjii naji giyiiikhwaajj gaa
 Ch'ankey'aa Shroodiinyaa yineegwidaii. 19 Ch'arohahkat drin
 ji' geenjit Jesus Danky'aa zhit ajj dinjii ch'ankey'aa nilii naji jyaa
 dakhwa'yaa goo'aii nyaa ts'a' gwaandak. 20 Jii ch'ankey'aa naji t'ee
 Vit'eegwijyahchy'aa k'eegwagwahthat kwaa naji. Noah tr'ihchoo
 ahtsii gwiizhit Vit'eegwijyahchy'aa khalchi' kwaa ts'a' dinjii naji
 datr'agwagwaanduu akhagagoohoonjyaa geenjit nagwal'in. Ajj
 tr'ihchoo zhit dinjii nihk'iidoq naji zhrih chu' ts'i' gwizhiinjil.
 21 Ajj dinjii naji chu' ts'a' an giheelyaa gwits'i' gook'aanti', gwik'it
 chu' nakhwats'an tr'itsajj zhit neenakhwahshii k'it t'oonchy'aa.

Diitthaj' k'eech'arahahtryaa t'igwii'in kwaa gaa diidrii zhit vaa shriitr'eegwarehee'aa eenjit Vit'eegwijyahchy'aa tr'ooahaahkat ts'a' diiyinji' haa deegwehee'yaa gwinyaa gwik'it t'igwii'in. Jesus Christ neegwiindaii gwik'iighai' nineereheezhii. ²² Jesus zheekat gwits'eehoozhii ts'a' Vit'eegwijyahchy'aa vishriits'ajii dhidii haa zheekat gwich'in ts'a' ch'ankey'aa nint'aii kwaii datthak ts'a' k'eedeegwaadhat.

Gwik'injohkhit Haa Ch'ijuk Gohdaii

4 ¹ Christ datthaj' zhit khaiinjich'iindhat gwik'it nakhwan t'ee nakhwatthaj' zhit khaiinjich'anakhwarakhhit ji' t'ee nakhwatr'agwaanduu gweheekwaa. Nats'aa khaiinjich'iindhat gininjich'ohthat gwik'iighai' nakhwat'aii neegohtsii. ² Juk gwats'an lyaa zhyaa Vit'eegwijyahchy'aa nats'ahts'a' jii nankat gohdaii nakhoonyaa gwik'it gohghdaii gwizhr̄ih, nakhwan nats'ahts'a' gohdaii nothan gwik'it nakwaa. ³ Yeenii juu gwik'injiighit kwaa ts'a' googwitr'it tr'agwaanduu najii k'it t'akhwa'ya', gwiizuu gwizhr̄ih t'agoo'ya' nothan, dineech'oonjik ts'a' chan khaihlan nineekhwadal ts'a' nihts'a' gwiizuu t'akhwa'in, ohleji ts'a' ch'akhwanii geenjit khaihlan nineekhwadal, ch'ik'itiltsi' zhr̄i' ts'a' chan khagadqhii jii kwaii duuyeh gwik'it t'akhwa'in goo'aii. ⁴ Ajjts'a' t'ee zhit juu gwik'injiighit kwaa najii gook'it t'akhwa'in kwaa daj' lyaa gwik'injigiighit kwaa ts'a' gwiizuu nakhwats'a' giginkhii. ⁵ Gaa niighit kwaa ajii Vit'eegwijyahchy'aa Ch'arohakat Drin ji' goovahaahkat ts'a' juu gwandaii akwat niindhat haa nihteetr'iheelyaa. ⁶ Izhit geh'an juu niindhat najii gaa goots'a' ginkhe' ajii Gwandak Nizii goovaagwaandak geenjit. Juu jii nankat gwandaii najii nihteetr'ili ts'a' daganky'aa zhit Vit'eegwijyahchy'aa k'it gogwehendaii geenjit. Vit'eegwijyahchy'aa, Dinjii najii datthak nihteetr'iheelyaa gaagwiindaii.

Jidii Vit'eegwijyahchy'aa Diinant'eegwin'ajii Ajii Gwinzii T'igwii'in Geenjit Gwizhr̄ih Vit'eegwahahchy'aa T'inchy'aa

⁷ Nan ndaanaj'aj' gwats'a' niighit kwaa t'oonchy'aa, khagadqhii ts'a' deekhwa'in gwak'oqhtii gwiizhit, nohkhhii shro'! ⁸ Jii t'ee lyaa gwintsii geegoo'aii t'igwehee'yaa goo'aii! Nihleenjit ch'eet'igwiniindhan akhwa'ji. Ch'eet'igwiniindhan zhr̄ih nihleenjit khwa'ji daj', gweedhaa datthak nakhwats'a'

tr'agwaanduu t'ii'in nājī gooveenjī gineehoondee. ⁹K'eegwiichy'aa t'ohnyāā kwaa ts'a' juu gwik'injiighit nājī nakhwazheh nihdōhchik. ¹⁰Vit'eegwijyahchy'aa nihlehjuk gwinzii t'akhwa'in nakhwant'l'eegwiin'āī, āī vaa nihlits'igweheenjyaa t'inchy'aa. ¹¹Giinkhīh nājī, Vit'eegwijyahchy'aa Viginjik eech'oohtan; juu vitsyaa nilii nājī, Vit'eegwijyahchy'aa t'aih nakhwant'l'eiin'āī haa vitsyaa qhīī. Jidii datthak zhit Jesus Christ vik'iighai' Vit'eegwijyahchy'aa deerahaāh'aa. Adan zhrih khīt ts'a' khīt geenjit vich'eegwahdrii ts'a' t'aih haa vats'an nilii! Amen!!

Gwik'injigwiighit Geenjit Khaiinjich'iriighit

¹²Shijyaa gwilee nājī, gwinlēīī geegwaroolii kwaa nakhwadrii zhit gwiizūū nakhwats'a' t'igwehee'yaa, juk gwizhrih nakhwats'a' jyaa digwehee'yaa kwaa t'oonchy'aa gaa nakhwak'injigwiighit hi'didlii ji' geenjit t'igwii'in. ¹³Christ khaiinjich'akhwadhat gwik'it nakhwan chan khaiinjich'akhwaghit āī geenjit shoo qhīī, nījin vich'eegwāhndit gwizhrih nagwaatth'at ji' lyyaa nakhwaashrigweheechy'aa. ¹⁴Christ vik'injuhkhīt geenjit gwiizūū nakhwats'a' girinkhīi ji' geenjit shoo qhīī, āīī'tee Vit'eegwijyahchy'aa vich'eegwāhndit nakhwaa nilii t'oonchy'aa. ¹⁵Khaiinjich'akhwaghit ji', dinjii ēhdaa tr'agoh'āīī, ch'oh'īī akwat nakhweh'an gwiizūū t'igwii'in akwat nakhwadraii t'igwii'in kwaa gwa'an gaanagoh'āīī, jii kwaii eenjit khaiinjich'akhwaghit shrō'! ¹⁶Gaa gwik'injuhkhīt geenjit khaiinjich'anakhwarahthat ji' gwa'oozhīi qhī' shrō' gaa Christ vats'an qhīī geenjit Vit'eegwijyahchy'aa mahsi' vohnyāā.

¹⁷It'ee khaiinjii Ch'aroahkat Drin nigwiindhat ts'a' gwik'injiighit nājī tr'ookit tr'ooahaahkat. Diikhwan tr'ookit diiroohahkat ji', juu Vit'eegwijyahchy'aa Vagwaandak Nizīī k'injiighit kwaa nājī nats'āā teeheedhat li'?

“Dinjii nizīī nājī gaa neehezhiī geenjit gogwanrii, akwat zhit juu Vit'eegwijyahchy'aa nehts'i' nilii nājī ts'a' tr'agwaanduu tr'agwah'in nājī goodivee deegweheechy'aa li'?”

¹⁹Vit'eegwijyahchy'aa deekhwa'ya' nakhoonyaa izhit geh'an khaiinjich'anakhwahthat ji' nihk'it gwinzii tr'agoh'in, Vit'eegwijyahchy'aa nakhwiłtsāīī vint'eedoochīī, nakhweenjit deeshi'yaa nakhwaiinyā' chy'aa khīt gwik'it t'ihee'yaa t'inyāā.

Vit'eegwiyahchy'aa Vidivii Najj

5 ¹⁻²Shij, ch'anjaa ihtii ts'a' tr'igiinkhii zeh gwach'anjaa kih dilk'ii najj nakhwaagwaldak. Christ khaiinjich'akhwadhat gwaqa'ya'. Aajts'a' jii jidii ch'eegwahndit nakhwats'a' googwahaakyaa, shij gaa yalat shats'an hahtsyaa. Vit'eegwiyahchy'aa nats'ahts'a' divii k'aahtii nakhwiltsajj aji gaatr'ooh'ee shro' gaa Vit'eegwiyahchy'aa nats'ahts'a' doo'ya' nakhoonyaa gwik'it t'akhwa'in. Geenjit laraa noh'ya' shro', gaa Christ vik'injuhkhith aji h'ididlii haa veenjit tr'agoh'in. ³Aji juu vik'eehqohtyaa geenjit nakhwant'eeriinlii najj eenjit tr'ihkhith goots'a' k'eedeegoodhat shro', gaa goovandah gwinzii tr'agoh'in. ⁴Ajts'a' nijin Divii K'aahtii Choh vineegwiilkij ji' vich'eegwahndit duuyeh nikyaa nakhwant'eegwehee'aa. Zhit ch'eegwahndit t'ee, divii k'aahtii akhagoonjik kwaa najj ant'eegweheelyaa.

⁵Izhit gwik'it, k'eejit najj, ch'anjaa najj k'eegohthat. K'eegwiichy'aa nihleenjit t'akhwa'in dai' tr'ihkhith adashoo qhli' shro'! Dehtly'aa Choh kat jyaa digwinyaa,

“Vit'eegwiyahchy'aa juu adashoo ahlii kwaa najj ts'a' nizii ts'a' juu adashoo ahlii najj akhooheenjyaa.”

⁶Adashoo qhlii kwaa ts'a' Vit'eegwiyahchy'aa vant'ee'adoolij ts'a' nijin T'iindhan ji' ndak ganakhwahahchyaa. ⁷Jidii geenjit tr'agohdii kwaii datthak vant'eegohlii, gwint'oo nakhweenjit ninjich'adhat t'inchy'aa.

⁸Ch'ankey'aa Tr'aanduu nakhwajyaa nilii kwaa, veenjit gwak'oontii gwizhit nakhwagwandaii chan k'oqhtii, lion k'it vagwantii ts'a' dinjii hee'aa gwizhrhij gwakantii t'inchy'aa. ⁹Nakhwagwik'injigwiighit t'aih haa anvooe, jii nankat gwik'injiighit najj datthak gwik'it khaiinjich'igiighit gaakhwandaii. ¹⁰Ch'ihlee khaiinjich'akhwadhat aji t'ee, Vit'eegwiyahchy'aa khith nakhwats'a' ch'eiinzhrii gwizhit datthak nakhweenjit shrigweheelyaa ts'a' Christ vat'aii k'iighai' ts'a' vich'eegwahdrii ndaanaa'aji' kwaa haa nakhweenjit deehee'lyaa nakhwahnyaa aji gwik'it t'ihhe'lyaa. Nakhwadrii nint'aii gwahahtsyaa haa duuyeh Christ vik'injuhkhith nakhwaleegwaraha'aji.

¹¹T'aih ndaagwaa'aji' kwaa gwats'a' datthak geenjit vats'an ooli'! Amen!!

Peter Khaiinkoo Neegeedi'

¹²Silas, vik'iighai' jii dehtly'aa nahgwan nakhwats'a' djht'oo, lyaa gwik'injiighit vaashandaii. Vit'eegwiyahchy'aa

vich'eegoonzhrii hi'didlii haa gwiintl'oo nakhwats'a' giikhke' aji
zhit vaanahohthat eenjit t'ihnyaq.

¹³Babylon kwaiik'it gwachoo tr'igiinkhii zheh gwizhit
gwik'injiighit naji. Vit'eegwijyahchy'aa gwitee tr'anakhweiinlii haa
shii ts'a' shidinji' Mark gwik'injigwiighit zhit nakhwadiveegoozu'
nakhwarahnyaq.

¹⁴Ch'eet'igwiniindhan haa nihlanli' teegohjii. Juu Christ ts'an
nilii naji datthak tsinehdan nakhwaa ooli'.